

四庫全書

子部

欽定四庫全書

名賢氏族言行類稿卷五

宋 章定 撰

盧

百三十

姓纂姜氏齊太公之後至文公子高高孫傒食采於
盧今盧縣是也因姓盧氏秦有博士盧敖漢有燕王
盧綰

左傳襄公二十三年齊侯伐衛上之登御邢公盧蒲癸

為右

史記盧綰豐人也與高祖同里同日生及壯俱學書又相愛也高祖以為太尉常從出入卧内衣被飲食賞賜羣臣莫敢望封為長安侯後歷為燕王

後漢盧植字子幹涿郡人音聲如鐘性剛毅有大節常懷濟世志九江蠻反四府選植才兼文武拜九江太守蠻寇賓服拜盧江太守深達政宜務存清靜弘大體而已後為尚書彭伯曰盧尚書海內大儒人之

望也 名著海內學為儒宗士之楷模國之楨幹

魏志盧毓字子家以學行見稱為安平廣平太守所在有惠化入為侍中在職三年多所駁爭詔曰毓稟性貞固心平體正可謂明試有功不懈于位者以為吏部尚書時舉中書郎詔曰得其人與否在盧生耳後遷司空封容城侯 毓所選舉先舉性行而後言才

晉書盧欽字子若世以儒業顯清澹有遠識 領吏部

舉必以材稱為廉平 文武之聲著於方夏歷宰州
郡不尚功名唯以平理為務祿俸散之親故不營貲
產 子浮字子雲為太子舍人 弟珽字子笏衛尉
卿 珽字志字子道 志子諶字子諒才行高潔為
一時所推

北史盧魯元寬和有雅度以忠謹給侍東宮太武即位
以為中書侍郎內外大臣莫不敬憚 好掩人過揚
人美公卿咸親附之以工書有文才累遷中書監領

秘書事子內給侍東宮景穆深昵之

盧玄字子真祖偃父邈並仕慕容氏偃為營丘太守邈為范陽太守皆以儒雅稱 玄應召為中書博士遷

侍郎崔浩與言輒嘆曰對子真使我懷古之情更深

子度世字子遷幼聰達有計數與族兄遐俱以學

行為時流重 子伯源伯源子道將字祖業涉獵經

史風氣謇諤有文才為一家後來冠 遷燕郡太守厲勸

學業敦課農桑墾田歲倍

盧思道字子行聰爽俊辯通脫不羈後為武陽太守

盧昌衡字子均沈靜有才識為後進風流之士隋初

拜祠部侍郎出為徐州長史甚有能名吏部蘇威考其績曰德為世表行為士則論者以為美談

盧元明字幼章風采閒潤進退可觀善自標置不妄交遊中山王熙嘆曰盧郎有如此風神唯須誦離騷飲美酒自為佳器

盧潛少有成人志尚文襄言其終可大用歷司州別

駕江州刺史所在有善政除揚州刺史在淮南十三年大樹風績徵為五兵尚書

盧柔字子剛未冠解屬文但口吃不能持論為黃門侍郎周文知其貧解衣賜之卒儀同三司子愷字長仁涉獵經史有當世幹能隋初攝尚書左丞每有敷奏侃然正色雖逢喜怒不改其常文帝親考百僚以愷為上拜禮部尚書

盧觀字伯舉少好學有雋才舉秀才射策甲科除太學

博士著作佐郎 弟仲宣才優洽兄弟俱以文章顯
弟叔彪少機悟好竒策 仕齊為中庶子叔彪在
鄉有粟千石至春夏鄉人無食者令自載取至秋任
還其價而不計 累遷太子詹事

盧文偉字休族少孤有志尚州辟主簿 舉秀才除參
軍後為青州刺史輕財好客善於撫接好為小惠頗
得人情承候寵要餉遺不絕 子恭道溫良有文學
位范陽太守有德惠 子詢祖文詞華美為後生之

俊詢祖初襲爵為大夏男有宿德朝士謂曰大夏初
成詢祖應聲曰且得燕雀相賀 同字叔倫累遷尚
書左丞請正吏部勲簿 兄子景裕字仲孺謙恭守
道貞素自得世號居士 節閔初除國子博士待以
不臣之禮 齊文襄令景裕解所注易景裕理義精
微從容往復無際可尋士君子嗟美之 弟辯字景
宣博通經籍舉秀才為太學博士 注大戴禮 周
文以其有儒術甚禮重之朝廷大議常召顧問領國

子祭酒 弟光字景仁精於三禮善陰陽解鍾律卒
於陝州長史 子賁字子徵涉書記解鍾律為懷州
刺史決沁水東注名曰利人渠又派入溫縣名曰溫
潤渠人賴其利 景裕從弟勇字季禮 齊神武署
為丞相主簿 懔懔有不可犯色 遷揚州刺史神
武賜勇書曰吾委卿揚州安枕高卧無西南之慮矣
盧誕博學有詞采起家侍御史周文帝以其儒宗學術
為當世所推拜國子祭酒

儒林盧醜太武監國醜以博學入校經 後以師傳舊
恩位尚書

節義盧楚大業中為尚書左司郎當朝正色甚為公卿
所憚

唐盧祖尚字季良光州人隋末募壯士捕盜時年十九
善御衆所向有功盜不入境後歷刺史有能名貞觀
二年交州都督以賄敗以祖尚才備文武可用也

盧承慶字子餘幽州人貞觀初為秦州參軍入秦軍事

太宗偉其辯 遷民部侍郎帝問歷代戶版承慶叙
夏商至周隋增損曲折引據該詳帝嗟賞 檢校兵
部侍郎 知五品選校百官考有坐漕舟溺者承慶
以失所載考中下以示其人無愠色更曰非力所及
考中中亦不喜承慶嘉之曰寵辱不驚考中上其能
著人善類此

盧藏用字子潛幽州人舉進士不得調隱終南少室二
山與陳子昂趙貞固友善長安中授左拾遺武后作

興泰宮於萬安山上疏諫云云 善著龜九宮術工
草隸大小篆八分善琴奕思精遠士貴其多能 為
折滯論世謂知言 子昂貞固前死藏用撫其孤有
恩人稱能終始交

盧懷慎滑州人在童州已不凡父友韓思彥嘆曰此兒
器不可量第進士遷侍御史諫中宗朝謁武后開元
間入相不營產服器無金玉文綺之飾所得祿賜於
故人親戚無所計惜

盧與早脩整為吏有清白稱為陝州刺史帝次陝嘉其
政題贊於廳事曰專城之重分陝之雄亦既利物內
存匪躬斯為國寶不墜家風 天寶初為南海太守
時謂自開元後四十年治廣有清節者宋璟李朝隱
盧與三人而已

盧從愿字子襲舉制科高第拜吏部侍郎吏選自中宗
後綱紀耗蕩從愿精力於官六年以平允聞帝異之
時號前有裴馬後有盧李 遷豫州刺史政嚴簡奏

課為天下第一寶書勞問

盧從史先在元魏時為盛族少好騎射遊澤潞間節度使李長榮署為督將貞元後為藩臣

盧羣字載初嗣曹王臯節度江西奏為判官以勁正聞入為侍御史郭子儀家與嬖人張昆弟訟財不平德宗促按之羣奏言子儀有大勲德今所訟皆其家事請赦勿問人謂其識大體

盧景亮字長晦幽州人學無不覽第進士宏辭遷右補

闕朱泚反景亮覲德宗曰陛下罪已不至則感人不
深帝然之 在諫諍地書數上鯁毅無所回

盧簡辭字子策與兄簡能弟弘止簡求皆有文並第進
士歷佐帥府遷侍御史習諸法令及臺閣事 福建
鹽鐵官盧昂坐贓簡辭窮治之乃得金牀瑟瑟枕大
如斗敬宗曰禁中無此為吏可知 子知猷中進士
登宏辭補秘書正字出為饒州刺史以政最聞 器
量渾厚世推為長者善書文辭瞻麗

盧鈞字子和舉進士第以拔萃補秘書正字遷給事中
有大詔令必反覆駁奏擢嶺南節度使海道商舶始
有異時帥府爭先售其珍鈞不取時稱潔廉以清靜
治下令蕃華不得通婚南方服其德不懲而化

盧奕疎眉目謹重寡欲斤斤自修與兄奐名相上下而
剛毅過之拜御史中丞自懷慎奐及奕三居其官清
節似之 俄留臺東都兼知武部選安祿山陷東都
奕被執將殺即數祿山罪罵賊不空口逆黨為變色

肅宗詔有司謚曰貞烈 子元輔字子望少以清行
聞擢進士補校書郎

盧鴻字顥然博學善書籀盧嵩山開元初備禮徵再不
至制許還山賜隱居服

盧照隣字昇之范陽人調鄧王府典籤王重之謂曰此
吾之相如也

盧綸字允言河中人與吉孚韓翃等皆能詩齊名號大
厯十才子

盧仝居東都愈為河南令愛其詩厚禮之自號玉川子
嘗為月蝕詩以譏切元和逆黨愈稱其工

五代盧程不知其世家何人也唐昭宗時舉進士為鹽
鐵出使巡官唐亡避亂燕趙變服為道士遊諸侯間
豆盧革盧汝弼皆故唐時名族與程門地相等因共
薦之以為河東節度推官莊宗即位議擇宰相節度
判官盧質當拜而質不樂任事乃言豆盧革與程皆
故唐時名族可以為相莊宗遂相之

盧光稠譚全播皆南康人也光稠狀貌雄偉無他材能
全播勇敢有識畧而全播常竒光稠為人唐末羣盜
起南方全播謂光稠曰天下洶洶此真吾等之時無
守此貧賤為也乃相與聚兵為盜衆推全播為主全
播曰諸君徒為賊乎而欲成功乎若欲成功當得良
帥盧公堂堂真君等主也衆陽諾之全播怒拔劍擊
木三斬之曰不從令者如此木衆懼乃立光稠為帥
盧文進字大用范陽人也為劉守光騎將唐莊宗攻范

陽文進先降拜壽州刺史奔契丹使守平州明宗即位文進自平州率衆數萬歸唐明宗得之喜甚以為義成軍節度使後奔李昇以文進為天威統軍宣潤節度使

盧導字熙化范陽人也唐末舉進士為監察御史梁累遷左司郎中侍御史知雜事以病免唐明宗時召拜右諫議大夫遷中書舍人 晉朝為吏部侍郎

盧文紀字子持其祖簡求為唐太原節度使父嗣業官

至右補闕文紀舉進士事梁為刑部侍郎集賢殿學士唐明宗時為御史中丞歲餘遷工部尚書文紀為人形貌魁偉語音琅然廢帝竒之廢帝入立欲擇宰相問于左右左右皆言文紀及姚顗有人望廢帝因悉書清望官姓名內琉璃瓶中夜焚香祝天以飭挾之首得文紀欣然相之後以太子太保致仕

盧質字子微河南人也父望唐司勳郎中質幼聰慧善屬文事唐為秘書郎丁母憂去後遊太原晉王以為

河東節度掌書記莊宗即位拜太原尹北京留守遷
戶部尚書翰林學士梁平權判租庸遷兵部尚書天
成元年拜匡國軍節度使

宋朝盧多遜懷州河南人也父億字子元少篤學以孝
悌聞舉明經調新鄉主簿舉進士為校書郎集賢校
理仕周累至司封郎中弘文館直學士出為河南令
國初遷少尹億性恬退聞其子多遜知制誥即告老
授少府監致仕多遜舉進士為秘書郎集賢校理遷

左拾遺改右補闕知制誥太祖征太原以多遜知太原行府事開寶六年拜中書舍人參知政事多遜博涉經史善伺人主意太祖好讀書每遣使取書史館多遜伺知即通夕閱視誥朝問書中事多遜應答無滯太祖寵異之太宗即位拜中書侍郎入相從平太原加兵部尚書

盧政太原文水人也以神位都頭數與夏人戰有功累遷武泰軍節度使年七十餘而氣貌不衰侍立殿下

更數時無情容扈從輦前猶能上馬踴躍前導觀者
壯之卒贈開府

朱

百三十一

姓纂顓頊之後周封曹挾於邾為楚所滅子孫去邑
以朱為氏一云舜臣朱彪之後齊有朱毛漢有中邑
侯朱進隱陵侯朱漢 吳郡漢功臣又都昌侯朱軻
軻至買臣會稽太守

左傳哀公六年朱毛告陳子曰器二不匱君二多難

新序梁王曰朱公以布衣富侔國是必有奇智

史記平原君朱建者楚人也為人辯有口刻廉剛直行
不苟合義不取容辟陽侯行不正欲知平原君平原
君不肯見

前漢朱買臣字翁子吳人也常艾薪樵賣以給食擔束
薪行且誦書 嚴助薦之召見說春秋言楚詞武帝
說之拜為中大夫後拜會稽太守上謂之曰富貴不
歸故鄉如衣繡夜行 年五十當富貴

朱雲字游魯人也長八尺餘容貌甚壯以勇力聞年四十乃變節受易與論語好倜儻大節與五鹿充宗論易連柱五鹿君諸儒語曰五鹿嶽嶽朱雲折其角由是為博士願賜上方斬馬劍斷佞臣張禹攀折殿檻

朱博字子元杜陵人也好客少年捕搏敢行隨從士大夫不避風雨察廉補安陵丞及為冀州刺史行部決遣如神遷琅琊太守斥罷諸病吏又敕功曹官屬

多褻衣大袍不中節度自今掾史衣皆令去地三寸

以高第入守左馮翊其治多武譎網絡張設少愛

利敢誅殺然亦縱舍時有大貸後為大司空更拜

御史大夫為人廉儉食不重味案上不過三楮賓

客滿門欲仕宦者薦舉之欲報讐怨者解劍以帶之

其趨事待士如此忠信勇猛材畧不世出誠國家

雄俊之寶臣

杜業傳

循吏朱邑字仲卿廬江舒人也舉賢良為大司農丞遷

北海太守治行第一入為大司農為人惇厚篤於故
舊然性公直不可交以私天子器之朝廷敬焉 及
卒天子憫惜下詔稱揚曰大司農邑廉潔守節退食
自公亡疆外之交束脩之餽可謂淑人君子賜邑子
黃金百斤以奉祭祀

游俠朱家魯人魯皆以儒教而朱家用俠聞所臧活豪
士以百數終不伐其能不飲其德 專超人之急甚
於已私自關以東莫不延頸願交

後漢朱祐字仲先南陽人光武拜建義大將軍將兵卒衆多受降以克定城邑為本不存首級之功

朱浮字叔元光武拜幽州牧上疏上守宰數易之弊

朱暉字文季南陽人為臨淮太守吏人畏愛歌曰強直自遂南陽朱季吏畏其威人懷其惠元和中肅宗召拜僕射上便宜報曰補公家之缺不累清白之素斯善美之士也

朱穆字公叔常感時澆薄乃作宗厚論又著絕交論

亦矯時之作 為冀州刺史部令長聞穆濟河解印
綬去者四十餘人 謚為文忠先生

朱雋字公偉好義輕財鄉閭敬之拜右中郎將討平黃
巾進西鄉侯

魏志方技朱建平善相術於閭巷之間効驗非一誠玄
妙之殊巧非常之絕技矣

吳志朱治字君理察孝廉州辟從事後拜安國將軍金
印紫綬 子才字君業留意賓客輕財尚義名聲聞

於遠近遷偏將軍

朱然字義封初為餘姚長山陰令累遷為左大司馬右軍師終日欽欽常在戰場臨急膽定尤過絕人雖世無事每朝夕嚴鼓兵在營者咸行裝就隊出輒有功

子績字公緒以膽力稱遷偏將軍後拜左大司馬朱桓字休穆除餘姚長遇疫癘穀貴乃分部良吏隱親醫藥殮粥相繼士民感戴之累遷為前將軍領青州牧以勇烈著聞輕財重義兼以強識與人一面數

十年不忘 子異字季文有將領之才克守堂構

朱據字子範吳郡人有姿貌膂力才無文武尚公主拜左將軍謙虛接士輕財好施

晉書朱伺字仲文有武勇而訥口不知書為將以謙恭稱前後擊賊每得勝 後加廣威將軍

朱序字叔倫世為名將為梁州刺史鎮襄陽 後拜征虜將軍

隱逸朱冲字巨容所居以禮讓為訓邑里化之路不拾

遺村無凶人毒蟲猛獸皆不為害

南史朱齡石字伯兒世為將平盧循有功為西陽太守
為元帥伐蜀卒以剋捷 弟超石亦果銳雖出自
將家兄弟並嫻尺牘 北伐破魏以為河東太守
後除中書侍郎

朱修之字恭祖父謀益州刺史修之為雍州刺史政在
寬簡士庶悅附立身清約百城贈貺一無所受

朱异字彥和遍覽五經尤明禮義 明山賓表薦异云

金山萬丈緣陟未登玉海千尋窺映不測 為太子
博士居權要三十餘年自員外常侍至侍中四官皆
珥貂自右衛率至領軍四職並驅鹵簿

孝義朱文濟字敬達吳興人自賣以葬母

見解叔傳

隱逸朱伯年少有高情與妻孔氏入會稽南山伐薪採
蕨為業時為詩詞往往有高勝之言

北史朱元旭字君昇累遷尚書左丞既無風操俛仰隨
俗性多機數自容而已

朱瑞字元龍介朱榮引為中書舍人居門下為腹心寄
後莊宗招納之兼左僕射

朱長生孝文時為散騎常侍使高麗責其王阿伏至羅
拜受獻物王大怒絕其飲食三歲乃放還孝文以其
守節拜河內太守

唐朱敬則字少連亳州人以孝義世被揚顯一門六關
相望志尚恢博好學重節義然諾善與人交振其急
難不責報於人武后稱制遂開告密羅織之獄敬

則因切諫后善其言 遷正諫大夫兼脩國史韋安

石嘗閱其史藁歎曰董狐何以加 時橫斂繁重后

數召入訪得失進平章事 張易之構魏元忠張說

誅之無敢言者敬則奏元忠秉心忠一乃不得死

敬則與三從昆弟居四十年貲產無異及執政每以

用人為先薦人皆稱其職

朱仁軌字德容敬則之兄隱居養親常誨子弟曰終身

讓路不枉百步終身讓畔不失一段有赤烏白雀棲

所居樹及卒員半千等共謚為孝文先生

朱朴襄州人以三史舉乾寧初上書議遷都

朱桃椎成都人淡泊絕俗嘗織十芒屨置道上見者曰

居士屨也 高士廡為長史備禮以請降階與語不

答瞪視而出士廡拜曰祭酒其使我以無事治蜀邪

乃簡條目州大治

朱子奢蘇州人貞觀初持節諭旨於高麗 帝嘗詔起

居紀錄臧否朕欲見之以知得失子奢曰陛下所舉

無過事雖見無嫌然以此開後世史官之禍可懼也
朱忠亮字仁輔汴州人舉明經不中往事昭義薛嵩為
裨將朱泚亂率麾下四十騎至奉天封東陽郡王為
定難功臣

朱延壽事楊行密以破孫儒功居多

五代朱珍徐州豐人也少從梁太祖為將善治軍選士
太祖鎮宣武珍為太祖創立軍制選將練兵甚有法
太祖得諸將所募兵及他降兵皆以屬珍珍選將五

十餘人皆可用梁敗黃巢破秦宗權東并兗鄆未嘗不在戰中而常勇出諸將太祖乃拜為淄州刺史

朱友謙字德光許州人也梁太祖表友謙代李璠梁兵西攻李茂貞太祖往來過陝友謙奉事尤謹因請曰僕本無功而富貴至此元帥之力也且幸同姓願更名以齒諸子太祖益憐之乃更其名友謙錄以為子太祖即位徙河中累遷中書令封冀王莊宗滅梁入洛友謙來朝賜姓名曰李繼麟賜予鉅萬

宋朝朱昂字舉之其先京兆人也父葆光寓潭州遂家於衡山昂少篤學有朱遵度者時謂之萬卷目昂曰小萬卷嘗游廬陵有術者謂昂曰中原當有真主矣君仕當至四品遂北游江淮周世宗南征韓令坤統兵揚州昂謁令坤陳治亂方畧令坤器之令攝永正縣有政績歸國為宰相薛居正所知與李昉薦引之遷殿中丞知泗州就遷監察御史江南轉運副使真宗即位遂知制誥入翰林為學士請老以工部侍

郎致仕 弟協仕為主客郎中雍王府翊善其後協
告老而歸時人以比漢二疎 買寄書於所居為二
亭曰知止曰幽棲自號曰退叟及卒門人謚之曰正
裕先生

朱光庭字公掞河南偃師人也舉進士范純仁知慶州
辟為僉書判官神宗召見問欲再舉安南之師光庭
對曰願陛下不以人類處之蓋得其地不可居得其
民不可使得已且已須要廣土辟地何益 哲宗朝

為左正言乞罷提舉常平保甲青苗等法 遷太常少卿除侍御史論蔡確怨謗之罪確貶新州拜諫議大夫遷給事中

朱昭字彥明府州府谷人也初浮沈班行人無知者後為震武城監押會城主闕攝其事以忠節立名

朱壽昌字康叔揚州天長人也生七歲父守長安出其母劉氏嫁民間母子不相知者五十年壽昌既仕而念母之不見也行四方求之不置飲食罕御酒肉與

人言輒流涕以浮屠法灼臂燒頂刺血寫佛書冀遂其志熙寧初棄官入秦與家人訣誓不見母不復還行次同州得焉劉氏時年七十餘矣由是天下皆知其孝壽昌始以母故通判河中府迎其同母弟妹以歸居數歲母卒泣涕幾喪明有白鳥集其墓上後為司農少卿東坡有朱孝子詩云此事今無古或聞謂李定母亡不持服介甫力主之也

朱服字行中吳興人紹聖初擢正言兼司業知諫院除

中書舍人出守滁廣宣廬四郡平生長於四六為詩
亦精東坡先生書夢中寄朱行中一篇南遷絕筆也
朱敦儒字希真洛陽人不為科舉之文放浪江湖間自
江西避亂過晉康御史明橐宣諭廣東被旨訪求遺
逸以希真應命召對改官入館為郎出憲浙東

朱松字喬年徽之婺源人也儒學決科綦叔厚為翰林
學士力薦於朝後為尚書郎出守建陽子熹

晦翁先生紹熙五年十月以煥章閣待制侍講嘉

定元年十月二十八日有旨賜謚

屠

百三十二

姓纂左傳晉大夫屠蒯禮記作杜蕢又屠羊說楚人
晉將屠岸賈風俗通濮末有屠景先河東人也

左傳僖公二十八年晉侯作三行以禦狄荀林父將中
行屠擊將右行先蔑將左行

昭公十六年鄭大旱使屠擊祝款豎柎有事於桑山


說苑晉太史屠餘見晉國之亂以其圖去歸周曰臣不

敢直言示晉公以天妖日月星辰之行

史 百三十三

姓纂顓臾風姓之後晉大夫史駢

左傳文公六年史駢曰介人之寵非勇也損怨益仇非知也以私害公非忠也



名賢氏族言行類稿卷五

欽定四庫全書

子部

名賢氏族言行類稿卷六

七

詳校官典籍臣潘奕雋

主事臣祁韻士覆勘

總校官進士臣朱 鈐

校對官中書臣張曾炳

謄錄監生臣劉為幹

欽定四庫全書

名賢氏族言行類稿卷六

宋 章定 撰

徐

百三十七

姓纂顓頊之後嬴姓伯益之子夏時受封於徐至偃
王為楚所滅以國為氏

左傳哀公十年徐承帥舟師自海入齊

孟子墨者夷之因徐辟而求見孟子

新序鄒陽上書曰徐衍負石入海義不苟取比周於朝
以移主上之心

史記主父偃傳武帝時趙人徐樂上書言世務書奏天
子召見謂曰公等安在何相見之晚也乃拜為郎中
數見上䟽言事遷為中大夫 漢書云燕郡無終人

儒林文帝時徐生以容為禮官大夫傳子至孫徐延徐
襄襄具天安善為容不能通禮經延頗能未善也襄
以容為漢禮官大夫至廣陵內史延亦為漢禮官大

夫是後能言禮為容者由徐氏

申公弟子徐偃為博士 為膠西中尉

後漢徐防字謁卿舉孝廉特補尚書郎職典樞機周密
畏謹

徐璆字孟玉少博學辟公府舉高第 遷荊州刺史奏
太守屬縣有藏汙悉徵按罪威風大行 遷汝南太
守轉東海相所在化行

徐穉字孺子豫章南昌人太守陳蕃不接賓客唯穉來

特設一榻去則懸之 桓帝以安車玄纁備禮徵之

不至角立傑出 南州高士

魏志徐奕字季才忠亮古人不過 魏初為尚書

徐晃字公明功最多封都亭侯 長驅徑入敵圍 先

為不可勝然後戰功踰孫武穰苴 遷右將軍

徐宣字寶堅文帝時為御史中丞又遷尚書 桓範薦

宣體忠厚之行秉直亮之性清雅特立不拘世俗確

然難動有社稷之節歷位州郡所在稱職以為左僕

射詔曰宣歷仕三朝公亮正色有託孤寄命之節
可謂柱臣也

徐邈字景山魏初為尚書郎私飲沈醉校事問以曹事
邈曰中聖人平日醉客謂酒清者為聖人濁者為賢
人累歷太守所在著稱遷撫軍大將軍涼州刺史
史廣開水田募民佃之家家豐足彈邪繩枉州界
肅清遷司隸校尉百僚敬憚歷事四世憂國忘
私志高行潔才博氣猛高而不狷潔而不介博而

守約猛而能寬聖人以清為難而徐公之所易也人以為通人以為介是世人之無常而徐公之有常也邈清尚弘通可謂國之良臣時之彥士矣

吳志徐盛字文嚮以勇氣聞江表之虎臣也

徐詳字子明吳郡人孫權之時幹興事業數通使命其
檠檠之佐乎

晉書徐寧字安期為興縣宰通朗博涉庾亮每屬桓
彝覓一佳吏部及遇寧欣然謂亮曰為卿得一佳吏

部矣徐寧真海岱清士因為敘之即遷吏部郎

徐廣字野民百家數術無不研覽除祕書郎領著作
勒成晉紀四十六卷遷祕書監

儒林徐苗字叔胄累世相承皆以博士為郡守遂為
儒宗作五經同異評輕財貴義公府五辟博士
再徵並不就

儒林徐邈博涉多聞補中書舍人撰正五經音訓學
者宗之處西省前後十年每被顧問輒有獻替多

所匡益 遷中書侍郎專掌綸詔帝甚親昵之後
為前衛率授太子經雖在東宮猶朝夕入見參綜朝
政修飾文辭拾遺補闕

子豁以孝聞為太常博士祕書郎

載記徐嵩字元高盛之子少以清白著稱苻堅時舉賢
良為郎中 遷長安令貴戚子弟犯法者一皆考究
請託路絕 落落有端貳之才

南史徐羨之字宗文祖寧尚書吏部郎父祚之上虞令

羨之為丹陽尹總知留任 後位司空羨之起布
衣無術學直以局度一旦居廊廟朝野推服咸謂有
宰臣之望 曉萬事安異同

兄欽之位祕書監 欽之子佩為丹陽尹 佩之弟
逵之尚武帝公主為彭城沛二郡太守

徐湛之字孝源逵之子事祖母及母以孝聞 後為南
兖州刺史善政俱肅威惠並行起風亭月觀吹臺琴
室招集文士盡游玩之適 孫孝嗣字始昌王儉曰

徐孝嗣將來必為宰相 出為吳興太守在郡有能
名 累遷至左僕射為丹陽尹 子緄仕梁為侍中
緄子君倩字懷簡為湘東王參軍文冠一府特有
輕艷之才新聲巧變人多諷習

徐廣字野人百家數術無所不覽 晉孝武以其博學
除為祕書郎仕宋領著作郎撰成晉史 兄子豁字
萬同宋初為尚書左丞山陰令精練法理為時所推
為始興太守表陳三事文帝嘉之賜絹二百疋穀

千斛

徐勉字修仁徐孝嗣見之曰此人中之騏驎必能致千
里有宰輔之量射策甲科補太學博士仕梁為
尚書左丞自掌憲樞多所糾舉時論以為稱職遷
吏部尚書居選彞倫有序客有求詹事五官正勉荅
云今夕止可談風月不宜及公事時人服其無私
徐摛字士秀為新安太守為政清靜教人禮義勸課農
桑暮月風俗便改

徐陵字孝穆，擢之子。年數歲，沙門釋寶誌摩其頂曰：「天

上石麒麟也。」仕陳，遷吏部尚書，提舉綱維，綜覈名

實。終太子少傅。為一代文宗，國家有大手筆，必

命草之。接引後進，無倦俸祿，與親族共之。子儉，份

儀傳。儉勤學，有志操。梁元帝召為金部郎中，侍宴

賦詩，帝嘆曰：「徐氏之子，復有文矣。」份為海鹽令，有

政績，入為太子洗馬。儀仕陳，位尚書殿中郎。陵

弟孝克，後為國子祭酒。

徐文盛字道茂仕梁為寧州刺史推心撫慰夷人感之
徐度字孝節少倜儻不拘小節錄前後戰功封廣德縣
侯後至司空子敬成安州刺史

徐世譜字興宗世居荊州為主帥勇敢有旅力以功除
信州刺史

文學徐伯陽字隱忍敏而好學善色養 讀史書三千
餘卷為侯官令甚得人和

徐耕元嘉中大旱人饑以米千斛助官振貸詔書褒美

酬以縣令

北史徐招字思賢少好法律及朝廷舊事初入洛陽

雖未登仕已為時知朝廷疑事多預議射策甲科

領儀曹郎中常恨才達恐名迹不立久之方轉二千

石郎中

儒林徐遵明字子判受詩書禮記嘗指其心曰吾今知

真師所在正在於此講學二十年海內莫不宗仰

聚徒教授懸納絲粟留衣物以待之

孝行徐孝肅事親以孝聞養母數十年未見其忿恚色
祖父母父母墓皆負土成墳廬于墓所奕世稱孝

隱逸徐則懷栖隱之操杖策入縉雲山後入天台山卓
矣仙才飄然騰氣千尋萬頃莫測其涯

藝術徐祿善占候觀驛馬星流而知赦至

徐之才十三為太學生粗通禮義劉孝綽曰此神童也
少解天文兼圖讖之學又善醫術

唐徐有功舉明經補蒲州司法參軍為政仁不忍杖罰

民服其恩更相約曰犯徐參軍杖者斥之訖代不辱
一人累遷司刑丞時武后僭位畏唐大臣謀已汙引
天下豪傑馳使者即按一切以反論后輒勸以官賞
急變相告言者無虛日朝野震恐莫敢正言獨有功
數犯言爭枉直后厲語折抑有功爭益牢論顏餘慶
得免死時在廷陞者數百人皆縮項不敢息而有功
氣定言詳截然不撓后召詰曰公比斷獄多失出
何耶對曰失出臣小過好生陛下大德后默然拜

司刑少卿與皇甫文備同按獄誣有功縱逆黨久之
文備坐事下獄有功出之或曰彼嘗陷君於死今生
之何也對曰爾所言私忿我所守公法為獄常持平
守正以執據冤罔凡三坐大辟將死泰然不憂赦之
亦不喜后以此重之全活者衆 鹿城主簿潘好禮
謂有功斷獄天下無冤人仁恕過漢于張盧若虛亦
曰徐公當雷霆之震而能全仁恕雖千載未見其比
徐商字義聲有功五世孫擢進士第宣宗拜河中節度

使突厥殘種以千帳度河自歸詔商綏定商表處山
東寬鄉置備征軍凡千人襍紙為鎧勁矢不能洞

徐彥伯兗州人七歲為文對策高第調蒲州司兵參軍
時司戶韋彥善判司士李亘工書彥伯屬辭時稱河
東三絕進給事中會郊祭上南郊賦一篇辭致典
綽兼筆累朝當時不及也

徐浩字季海越州人擢明經有文辭張說稱其才見喜
雨五色鵠賦咨嗟曰後來之英也肅宗立授中書

舍人四方詔令多出浩手造辭膽速而書法至精帝
喜之 兼尚書右丞建言故事有司斷獄必刑部審
覆詔可故詳斷復自此始 代宗召拜吏部侍郎
始浩父嶠之善書以法授浩益工書四十二幅屏八
體皆備草隸尤工世狀其法曰如怒猊抉石渴驥奔
泉云

徐岱字處仁蘇州人學無所不通辯論明銳李栖筠欽
其賢署所居為復禮鄉名達于朝 給事中史館修

撰 帝以誕日召講說

徐曠字文遠博通五經明左氏春秋時耆儒沈重講太學授業常干人文遠從之質問不數日而去或問之曰先生所說紙上語尚何觀重召與反復研辯嗟歎其能 性方正舉動純重大業初為太學博士世稱左氏有文遠為一時冠云 文遠說經徧舉先儒異論出新意以折衷聽者忘勞 高祖幸太學文遠發春秋題論難鋒生莫能屈帝異之

徐申字維降京兆人擢進士第遷韶州刺史進嶺南
節度使外蕃歲以珠璣瑁香文犀浮海至申於常貢
外未嘗索商賈饒盈

徐元慶為父報讎

徐齊聃字將道湖州人八歲能文太宗召試賜所佩金
削刀咸亨初詔突厥酋長子弟得事東宮齊聃上
書謂非恭威儀近有德之義

徐堅字元固齊聃子幼有敏性舉秀才及第天授三年

上言書有五聽令有三覆請如令覆奏則死者無恨
聖歷中楊再思引為判官屬文典厚再思每日為
鳳閣舍人樣與張說修三教珠英 玄宗改麗正書
院為集賢院以堅充學士副張說知院事堅於典故
多所諳識

五代徐懷玉亳州焦夷人也少事梁太祖與太祖俱起
微賤懷玉為將以雄豪自任而勇於戰陣從太祖東
攻兗鄆破徐宿懷玉金創被體戰必克捷所得賞賚

往往以分士卒為梁名將

宋朝徐勣字元功宣州南陵人也舉進士至徽宗朝除
寶文閣待制兼侍讀為中書舍人修神宗史 詔命
與蔡京同校正五朝寶訓勣耻與京同職力辭因奏
曰京姦惡也唐德宗用盧杞致建中之亂陛下不可
不察除給事為翰林學士久之知江寧府太平州召
對徽宗問曰卿久于外下民疾苦宜以告朕勣曰事
故未易勝言惟茶鹽法為最苦茶鹽取息太深故私

販者十百為羣若聚而為盜則可憂矣徽宗曰為國用不足故也勣曰生財有道理財有義用財有法今國用不足在陛下明詔有司推講而力行之徽宗稱善以疾除顯謨閣學士致仕

徐積字仲車楚州山陽人也少孤事母盡孝年四十不昏不仕不昏者恐異姓不能盡心於母也不仕者恐一日去其親也鄉人勉之就舉遂偕母之京師既登第未調官而母亡遂不復仕其後監司上其行以為

郡教授久之致仕歸山陽於是始娶而操履彌篤為
文怪而放終日面壁坐不與人接而四方事無不周
知其詳雖新且密無不先知也嘗與蘇軾曰自古皆
有功獨稱大禹之功自古皆有才獨周公之才以其
有德以將之故爾軾然其言 每歲甘露降於父母
墳域必踰月木為連理郡守迎入學甘露又降其舍
鄉間化之州具以聞賜絹米後部使者言積蘊德丘
園聲名顯著謚曰節孝處士官其一子

徐復字復之建州人也嘗游京師舉進士不中退而學
易通流行卦氣之法游淮浙間凡天文地理遁甲占
射諸家之說讀之必得其宜 賜號沖晦處士授其
子發校書郎徙居杭州十餘年卒

徐鉉字鼎臣揚州廣陵人也十歲能屬文與韓熙載齊
名江南謂之韓徐仕吳為祕書郎南唐為吏部尚書
王師圍金陵煜遣鉉朝京師求緩兵太祖以禮遣之
後隨煜至京師 太祖責之鉉對曰臣仕江南國亡

不能死臣之罪也 太祖歎曰忠臣也以爲太子率
更令從征太原加給事中出爲左散騎常侍 李穆
嘗使江南見鉉及其弟錯文章歎曰二陸不能及也
曾慥云錯好李斯小篆尤得其妙

徐禧字德占洪州分寧人也有膽氣好言兵呂惠卿力
引之不次驟用累官給事中沒於永樂謚忠愍 子
俯字師川以卹典補官懷竒負氣爲筦庫爲吉倅皆
棄官去靖康初召爲尚書外郎復丐外補徑歸江右

高宗聞其名召為諫議大夫遂入翰林除簽樞晚
以端明奉祠俯七歲能詩深為舅黃山谷所知見百家詩
選

徐嘉字吉卿

紹興間為吏侍三十一年六月為都丞

子大中字致周蕭榜

登第嘗任太府寺丞大節為福建提舶棟與鄒榜叔
川皆諸孫也

徐詡楊誠齋嘗銘其墓附之拾遺門

虞

百三十八

姓纂舜有天下號曰虞子商均封虞因以為氏又武
王封虞仲於河東亦為虞氏 會稽餘姚人趙相虞
卿秦有虞香

左傳襄公二十五年鄭子產曰昔虞闕父為周陶正以
服事我先王我先王賴其利器用也

國語夫成天地之大工者子孫未嘗不章虞幕能聽協
風以成樂物生者也其後皆為王公侯伯

新序虞丘子辭位而進孫叔敖相楚莊王卒以伯

史記虞卿者游說之士也躡蹻擔簦說趙孝成王一見
賜黃金百鎰白璧一雙再見為趙上卿故號為虞卿
論趙魏合從之便 不重萬戶侯卿相之印著書
八篇世傳曰虞氏春秋 太史公曰虞卿料事揣情
為趙畫策何其工也 新序曰趙王發虞卿東見齊
王與之謀秦虞卿之謀行而趙伯此存亡之樞機故
善謀之臣其於國豈不重哉

後漢虞延字子大初生其上有物若一匹練遂上升天

占者以為吉及長長八尺六寸腰帶十圍力能扛鼎
建武初除細陽令歲時伏臘輒休遣徒繫使歸家並
感其德應期而還 遷洛陽令外戚歛手莫敢干法

遷南陽太守

虞詡字升卿十二通尚書為朝歌長故舊皆弔曰得朝
歌何衰詡曰不遇槃根錯節何以別利器 太守馬
稜曰君儒者當謀謨廟堂 後羌寇武都以詡有將
帥之畧遷武都太守 令吏士各作兩竈日增倍之

卒破羌衆後為尚書僕射 子恭有俊才官至上黨

太守

吳志虞翻字仲翔會稽人少好學有高氣州舉茂才召
為侍御史 作周易老子論語國語訓詁習經於枹
鼓之間講論於戎馬之上 後雖處罪放而講學不
倦門徒常數百人

晉書虞潭字思奧會稽人清真有檢操舉秀才徙醴陵
令領廬陵太守綏撫荒餘咸得其所 又為南康太

守 終於侍中 子嘯父亦至侍中

虞駿字思竹為吏部郎 有公才有公望

虞溥字允源將率之子篤志典墳 察孝廉除郎中為
鄱陽內史大修庠序廣招學徒謂學之染人甚於丹
青為政嚴而不猛風化大行有白鳥集於郡庭

虞預字叔寧少好學有文章 遷祕書丞著作郎雅好
經史憎疾玄虛著晉書四十餘卷

忠義虞悝長沙人弟望字子都 孝悌廉信為鄉黨所

稱更為治中別駕 兄弟南夏之翹雋而智勇遠聞
王敦之亂闔門為忠義

儒林虞喜字仲寧會稽人潔靜其操歲寒不移 志操
足以勵俗博學足以明道 鑽堅研微有弗及之勤
處靜味道無風塵之志 釋毛詩注孝經凡注術數
十萬言

南史虞丘進字豫之累遷太子右衛率及卒追論討司
馬休之功進爵為子

虞棕字景豫仕齊轉給事中加正員常侍性敦實與人
知識皆有終始

虞玩之字茂瑤仕宋為尚書右丞

虞荔字山披博覽墳籍仕梁兼中書舍人居于西省以
文史見知 陳文帝深器之常引左右朝夕顧訪凡
所獻替莫有見其際者 弟寄字次安弱冠舉秀才
對策高第為會稽中記室簡畧煩苛務存大體曹局
之內終日寂然 除中書侍郎

循吏虞愿字士恭會稽人為晉安太守在郡不事生業
立學堂教授 海邊有越王石常隱雲霧相傳云清
廉太守乃得見愿往就觀視清徹無所隱蔽

儒林虞廣徧講五經仕梁兼國子博士

文學虞通之有學行善言易至步兵校尉

附丘巨源傳

虞蘇少好學位中書郎

北史虞慶則幼雄毅少倣儻豪俠皆敬憚之 周時拜

石州總管甚有威惠稽胡慕義歸者八千餘戶後遷

右僕射 慶則降突厥可謂茂功

文苑虞世基字懋世博學有高才善草隸孔奐見之嘆
曰南金之貴屬在斯人 仕隋直內史省柳顧言曰
海內當共推此一人 遷內史侍郎 丁母憂哀毀
骨立煬帝曰方相委任宜為國惜身 特見親愛朝
臣無與為比

虞綽字士裕博學有俊才仕陳為太學博士 遷著作

佐郎常直禁中以文翰待詔

隋書亦有傳

唐虞世南越州人字伯施性沈靜與兄世基同受學于
吳顧野王餘十年精思不懈文章婉縟慕徐陵陵自
以類已世基辭章清勁過世南而瞻博不及也議者
方晉二陸大業中至祕書郎隋煬帝愛其才秦王
踐阼拜弘文館學士世南貌懦謹外若不勝衣而中
抗烈論議持正太宗曰朕與世南商畧古今有一言
失未嘗不悵恨其懇誠如此帝作宮體詩使賡和
世南曰體非雅正此詩一傳天下風靡不敢奉詔帝

曰朕試卿耳帝嘗命寫列女傳於屏風於時無本世
南暗疏之無一字謬帝每稱其五絕一德行二忠直
三博學四文詞五書翰帝手詔魏王泰曰世南於我
猶一體拾遺補闕無日忘之 後帝為詩一篇述古
興亡敕遂良即其靈坐而焚之數歲夢進讜言若平
生翌日下制厚卹其家

胡 百三十九

姓纂帝舜之後胡公封陳子孫以謚為姓 安定漢

有胡建始居焉

前漢胡建字子孟河東人守軍正丞甚得走卒心監
軍御史為姦建取斬之由是顯名後為渭城令治甚
有聲至今渭城立其祠

後漢胡廣字伯始南郡華容人察孝廉試為天下第一
拜尚書郎五遷尚書僕射為太傅時年已八十
繼母在堂朝夕瞻省諺曰萬事不理問伯始天下
中庸有胡公在公台三十餘年

魏志胡質字文德少知名於江淮間為常山太守在郡
九年吏民便安將士用命 遷征東將軍都督青徐
廣農積穀有兼年之儲 子威字伯武厲操清白嘗
省其父告歸賜其絹一疋威跪曰大人清白不審於
何得此絹質曰是吾俸祿之餘威乃受之官至前將
軍青州刺史對武帝曰臣父清恐人知臣清恐人不
知 威弟熊字季象亦有幹用至益州刺史 威子
奕字次孫平東將軍並以潔行垂名 質素業貞粹

可謂國之良臣時之彥士矣

吳志胡綜字偉則汝南人召為書部典軍國密事後為侍中孫權之時幹興事業文采才用每見信任其棖榘之佐乎

晉書胡奮字玄威性開朗有籌畧家世將門晚乃好學滅醜虜於河西制凶酋於磴北後加鎮軍大將軍

南史胡藩字道序以義烈成名後參武帝相國軍事平司馬休之亂及廣固功封楊山縣男子隆世嗣

胡諧之為江州別駕風采瓌潤善自居處朝士多與交
遊遷都官尚書

胡僧祐字願果少勇決有功幹大敗侯景之將拜領
軍將軍

胡穎字方秀仕陳兼左衛將軍吳興太守

北史胡叟字倫許世為西夏著姓年十三辨疑釋理鮮
有屈焉既善典雅之詞又工鄙俗之句後歸魏
賜爵始復男

胡方回涉獵史籍詞彩可觀入魏為中書博士遷侍郎
改定律制當時朝賢並愛重之清貧守道以壽終

胡長絜仕齊遷章武太守為政清靜頗得人和除尚書
左丞當官正色無所回避

外戚胡長仁字孝隆仕齊歷左僕射尚書令

唐胡証字啟中河東人舉進士第渾瑊美其才奏寘幕
府累遷至諫議大夫党項屢擾邊証以儒而勇選拜
振武軍節度使又檢校工部尚書為和親使舊制行

人有私覲禮証請儉受省費以絕鬻官之濫虜人欲
屈脅之且言使者必易胡服証固不從不辱命還拜
節度使

胡楚賓秋浦人屬文敏甚必酒中然後下筆高宗命作
文常以金銀柶料酒飲之文成輒賜馬性重慎未嘗
語禁中事兼崇賢直學士

宋朝胡旦字周父渤海人也舉進士第一通判昇州代
還遷左拾遺出漕淮東徙知海州淳化中直集賢院

復知制誥久之通州襄州尋以祕書監致仕居襄州卒且雋辯強敏少有大志退老漢上既喪明猶令人讀經史憑几聽之未嘗少輟

胡宿字武平常州晉陵人也舉進士召試為館閣校勘改集賢校理通判宣州知湖州築石塘百里捍水患大興學校學者盛於東南自胡宿始既去而思之名其塘曰胡公塘而學者為立生祠久之為兩浙轉運使召還修起居注知制誥入翰林禮部四歲一貢

士議者患之請更為間歲議已定宿獨言使士子廢業而奔走無寧歲不如復用三年之制也衆皆非其言行之數年士子果以為不便卒用三年之制嘉祐六年拜左諫議大夫樞密副使宿當重任尤顧惜大體而郡臣方建利害多更張庶事以革弊宿獨厭之曰變法古人之難今不務守祖宗成法而徒紛紛無益於治也英宗即位遷給事中告老乃拜吏部侍郎觀文殿學士知杭州遷左丞以太子少師致仕

卒謚文恭

胡宗愈字元夫舉進士甲科世父宿罷副樞守杭陛辭之日英宗問子弟誰可繼卿者以宗愈對除兼史館檢討同知諫院 哲宗即位除右司遷起居郎中書舍人遷給事中又遷吏侍拜中丞首進六事曰端本正志知難加意守法畏天陛下若留神於此六者則治道得矣 哲宗問朋黨之弊宗愈曰君子義之與比謂小人為姦邪則小人必謂君子為朋黨陛下擇

中立不倚者用之則朋黨自銷明日進君子無黨論
拜尚書右丞坐言事以資政知陳州徙成都府明年
召還為吏部尚書卒謚修簡

胡瑗字翼之泰州如皋人也瑗為人師言行而身化之
使誠明者達昏愚者厲而頑傲者革故其為法嚴而
信為道久而尊自景祐明道以來學者有師惟瑗與
孫復石介三人瑗以布衣召見論樂拜校書郎嘗為
湖州學官慶歷四年建太學于京師有司請下湖州

取瑗教學之法以為則召為諸王宮教授以疾免
皇祐中召議樂為光祿丞國子監直講遷大理寺丞
嘉祐中遷太子中允充天章閣侍講尋致仕東歸之
日太學之諸生與賢士大夫送之東門執弟子禮路
人嗟歎以為榮

胡安國字康侯建州崇安人舉進士第二後為湖南提
舉學事坐薦隱逸削籍免官宣和末徽宗召為左史
未及赴靖康初召試中書舍人遷給事中 高宗即

位以舊職召兼侍讀足疾不任朝謁除待制奉內祠
知永州不赴提舉太平觀令纂修所著春秋紙札並
從官給書成奏御除寶文閣直學士 謚文定 子
寅字明仲官至禮侍後以徽猷閣直學士知永州
姪憲字原仲紹興間侍從薦對改秩奉祠

胡直孺字少汲嘗有詩云我無健筆翻三峽君有長才
肅五兵同是行人更分手不堪風樹作離聲黃魯直
見之稱賞政和中自都司出憲河北 宣和中守平

江除發運入為戶侍 靖康知南京統兵勤王力戰
為敵所執帥矜其老得歸建炎拜刑部尚書

並見百家詩

余 百四十

姓纂新安風俗通云由余之後代居歙州

南史孝義余齊人少有孝行父亡號叫而絕有司奏改
其里為孝義里

宋朝余靖字安道韶州曲江人也舉進士遷祕書丞集
賢校理范仲淹以言事忤意貶饒州諫官御史不敢

言靖上疏論仲淹不當貶且言陛下親政以來屢逐
言事者恐鉗天下口不可坐落職知秦州以母憂去
官慶歷中除右正言方是時仁宗勵精政事增諫官
員將以有所為靖數言事合意遷知制誥三使北戎
時相忌之出知吉州坐習蕃語奪官分司六年起知
虔州帥潭移青卒謚襄

吾 百四十一

姓纂夏諸侯昆吾之後

吳志吾粲字孔休吳郡人生數歲孤城嫗見謂其母曰
是兒有卿相之骨 為曲阿丞治有名迹又為山陰
令還為參軍校尉以舟師拒魏將於泊口 後為太
子太傅抗言執正

晉書吾彥字士則有文武才幹膂力絕羣 為金城太
守為交州刺史威恩宣著南州寧靖

扶 百四十二

姓纂漢有廷尉扶嘉 河南官氏志乞扶氏改為扶氏

北史扶猛字宗畧其種落號白獸蠻仕梁位南洛北
司二州刺史從賀若敦南討梯山捫葛備歷艱阻
遂入白帝城撫慰人夷莫不悅附又破漢南諸蠻
進大將軍

鳥 百四十三

姓纂齊有鳥餘鳥枝鳴莒有鳥存秦有鳥獲鄱陽
姓苑云今鄱陽有此姓河南代北人烏石蘭改姓
烏

唐烏承玘字德潤張掖人開元中與族兄承恩皆為平
盧先鋒沈勇而決號轅門二龍奚契丹入寇詔承玘
擊之破於捺 勸史思明束身歸朝 奔李光弼表
為冠軍將軍封昌化郡王

烏重胤字保君承玘子擢河陽節度使帝討淮蔡詔與
李光顏相犄角大小百餘戰凡三年賊平進邠國公
出行伍善撫士與下同甘苦得士心待官屬有禮
當時有名士如溫造石洪皆在幕府既沒士二十餘

人刳股以祭

胥

百四十四

左傳僖公二十八年晉卻縠卒原軫將中軍胥臣佐下
軍上德也

哀公十七年衛侯夢于北宮公親筮之胥彌赦占之

宋朝胥偃字安道潭州長沙人也少好學柳開見其所
為文而器之曰子異日必有名於天下舉進士授大
理評事通判湖州稍遷太常丞修起居注知制誥久

之遷翰林學士知開封府

狐百四十五

姓纂周同姓居戎大狐伯生突突生毛偃毛生漆偃
生射姑代為晉卿蜀有狐篤

左傳閔公二年晉侯使太子申生代東山狐突御戎先
友為右先友曰握兵之要在此行也

僖公二十七年晉作三軍使狐偃將上軍讓於狐毛而
佐之

文公六年晉蒐于夷舍三軍使狐射姑將中軍

新序秦魯皆疑晉有狐偃之善謀以成伯功

狐突字伯行公子重耳外祖父也 子犯名偃突之子

也文公之舅又曰舅犯 子犯以璧授公子公子曰

所不與舅氏同心者有如白水投其璧於河 狐射

姑字季佗偃之子

名賢氏族言行類稿卷六

欽定四庫全書

名賢氏族言行類稿卷七

宋 章定 撰

蘇 百四十六

姓纂顓頊祝融之後陸終生昆吾封蘇鄴西蘇城是
也蘇忿生為周司寇居河內也 扶風武功漢蘇建
自河內徙扶風平陵

左傳莊公十九年蘇子奉子頹奔衛冬立子頹

尚書立政周公若曰太史司寇蘇公式敬爾由獄以長

我王國

念生為武王
司寇封蘇

史記蘇秦東周雒陽人說六國合從佩六國相印秦
之弟曰代代弟曰厲太史公曰蘇秦兄弟三人皆
游說諸侯以顯名其術長於權變

新序曰鄒陽上書曰蘓秦相燕燕人惡之於燕王燕王

按劍而怒何則臣主剖心析肝相信豈移於予辭哉
前漢蘇建杜陵人以校尉從衛青有功為平陵侯後

為游擊將軍出朔方為右將軍出定襄 後為代郡

太守卒 子武

蘇武字子卿 不降匈奴 齧雪咽旃 杖漢節牧羊

留匈奴十九歲及還拜為典屬國 甘露元年上

思股肱之美乃圖畫其形於麒麟閣

揚子張騫蘇武之奉使也執節沒身不屈王命雖古

之膚使其猶劣諸

後漢蘇竟字伯况拜代郡太守遷侍中

蘇章字孺文為冀州刺史故人為清河太守行部按其
姦賊乃請太守為設酒肴陳平生之好甚歡太守喜
曰人皆有一天我獨有二天章曰今夕蘇孺文與故
人飲者私恩也明日冀州刺史按事者公法也遂舉
正其罪州境望風畏肅

蘇不韋字公先 父謙為李嵩掠死獄中不韋仰天嘆
曰伍子胥獨何人也乃驅到魏郡掘其父冢斷頭以
祭父墳

儒林蘇順字孝山和帝時以才學見稱 好養生術隱
處求道晚拜郎中

魏志蘇則字文師為酒泉太守轉安定武都所在有威
名徙為金城太守撫循甚謹流民皆歸得數千家親
自教民耕種歲大豐收

竇滔妻蘇氏名蕙字若蘭善屬文滔為秦州刺史被徙
流沙蘇氏思之織錦為迴文詩以贈滔名璇璣圖宛
轉循環以讀之詞甚悽惋

南史蘇侃字休烈仕齊為黃門郎領射聲校尉 高帝
任以心膂

北史蘇綽字令綽累世二千石綽有王佐才對周文指
揮陳帝王之道周文不覺膝之前席曰綽真奇士即
拜行臺左丞參典機密 常以天下為己任博求賢
俊共弘政道

蘇威字無畏綽之子仕隋累遷刑部尚書政刑大小無
不籌之

蘇夔字伯尼威之子博覽羣言尤以鍾律自命隋詔天下舉達禮樂源者晉王昭舉夔帝曰惟此一人稱吾所舉後拜鴻臚少卿

蘇亮字景順綽從兄亮與弟湛皆著名西土一家舉三秀才 在魏除中書監領著作修國史 薦達後進常如不及一年或至三遷官僉曰才至不怪其速

蘇孝慈仕隋轉工部尚書表請公卿以不給職田 為

折州刺史洪州總管俱有惠政

蘇威夔孝慈
隋書皆有傳

循吏蘇淑字仲和除樂陵內使在郡綏撫甚有人譽歷
滎陽中山二郡太守清心愛下為吏人所思 稱為
良二千石

循吏蘇瓊字珍之為清河太守姦盜止息畜牧不收云
但存府君鄰郡富家將財物寄置界內以避盜

唐蘇世長京兆人十歲上書周武帝異其幼問讀何書
對曰治孝經論語帝曰何言可道荅曰為國者不敢
侮於鰥寡為政以德帝曰善 高祖興授玉山屯監

與語平生調之曰卿自謂佞邪直邪對曰愚且直
後拜諫議大夫 從獵涇陽大獲帝詫左右曰今日
畋樂乎世長曰陛下廢萬幾事游獵未為樂也帝笑
曰狂態發邪對曰為臣計則狂為陛下計則忠 侍
宴披香殿酒酣進曰此煬帝作邪帝曰卿好諫似直
然詐也此殿我所營乃詭云煬帝邪對曰臣但見傾
宮瑤臺非受命聖人所為者今乃即隋之宮加雕飾
焉欲易其亂得乎帝咨重其言

蘇良嗣世長子垂拱初拜納言裴匪躬案諸苑建言鬻
果蔬儲利佐上供良嗣曰未聞天子賣果蔬與人爭
利遂止

蘇弁字元容良嗣從孫擢進士累倉部郎中判度支案
裴延齡死帝召弁見延英賜紫衣金魚副知度支事
位郎中上度支有副自弁始通學術吏事精明承
延齡後平賦緩役人賴其寬聚書二萬卷手自讎
定時稱與祕府埒

蘇烈字定方冀州人驍悍有氣決年十五從父戰數先
登陷陣貞觀初從李靖襲頡利於磧口遷左衛中郎
將與程名振使高麗拜右屯衛將軍擢定方伊麗
道行軍大總管復征賀魯縛賀魯以還由是修亭障
列蹊隧定疆畛唐之州縣極西海矣高宗臨軒定方
戎服奉賀魯以獻策功拜邢國公會都曼諸胡劫
所部三國復叛詔定方為安撫大使選精卒襲之遂
面縛降俘獻於乾陽殿嶺以西遂定出為神丘

道大總管率師討百濟俘義慈隆泰等獻東都定方
所滅三國皆生執其王

蘇安恒冀州人博學尤明周官春秋左氏學武后末
年太子雖還東宮政事一不與安恒投匭上書云云
書奏后雖猜克不能無感召見賜食遣之

蘇味道趙州人九歲能屬辭與李嶠以文翰顯時號蘇
李逮冠州舉進士第裴居道倩味道作章攬筆而
具閒徹清密當時盛傳練臺閣故事善占奏

蘇瓌字昌容雍州人擢進士第居母喪哀毀加人張大
安表舉孝悌歷朗歙二州刺史時來俊臣貶州參軍
人懼復用多致書獨瓌不致書轉揚州大都督長
史州多名珍前長史貲取鉅萬瓌單身襤被自持
入為尚書右丞明曉法令多識臺省舊章一朝格式
皆所刪定拜尚書右僕射同中書門下三品進封許
國公時大臣初拜官獻食天子曰燒尾瓌獨不進曰
臣不稱職不敢燒尾進左僕射瓌治州考課嘗最為

相陳當世利病甚多

蘇頲字廷碩瓌之子弱敏悟一覽至千言輒覆誦第進士武后封高高舉賢良方正異等馬載曰古稱一日千里蘇生是已遷監察御史拜中書舍人時瓌同在禁苑朝廷榮之玄宗平內難書詔填委獨頲在太極後閣口所占授功狀百緒輕重無所差李嶠曰舍人思若涌泉無所不及起為工部侍郎辭不拜帝問宰相有自工部侍郎得中書侍郎乎對曰陛

下用賢何資之計乃詔以顥為中書侍郎陸象先歿
紫微侍郎未嘗補朕思其人無易卿者顥頓首謝明
日加知制誥給政事食給食自顥始 時李乂掌書
命帝曰前世李嶠蘇味道文擅當時號蘇李及朕得
顥與乂何愧前人 與張說以文章顯稱望略等故
時號燕許大手筆帝愛其文曰卿所為文章朕當留
中李德裕著論曰近世詔誥惟題叙事外自為文章
云

蘇珣雍州人申明經第調鄆尉時李美瑛為長史多訟珣裁決明辨自是無訴者美瑛異之顧廳事曰此公坐也

蘇晉珣之子數歲知為文作八封論房穎叔王紹宗數曰後來之王粲也舉進士及大禮科皆上第先天中為中書舍人玄宗監國所下制命多晉及賈曾藁定數獻讜言遷吏部時宋璟兼尚書事晉與齊澣更典二都選既糊名校判而晉獨事賞拔當時譽之

五代蘇逢吉京兆長安人也漢高祖鎮河東父悅為高祖從事逢吉常代悅作奏記高祖以為節度判官高祖建號拜逢吉中書侍郎同中書門下平章事是時制度草創朝廷大事皆出逢吉

宋朝蘇易簡字太簡梓州銅山人也少好學風度凝粹弱冠舉進士後為翰林學士淳化中充承旨易簡多振舉翰林故事太宗為飛白書院額曰玉堂及以詩賜之太宗曰此永為翰林中一美事易簡曰自有

翰林未有如今日之榮也太宗又草書宋玉大言賦
賜易簡易簡因擬賦以獻 他日易簡當禁直以水

試歌器太宗密聞之因晚朝從容問曰聞卿所玩非
歌器耶易簡曰然乃進曰日中則昃月滿則虧器盈
則覆物盛則衰願陛下持盈守盛念終始固萬世之
基業則天下幸甚遷給事中參知政事 易簡之執

政也太宗召其母薛氏入禁中賜寶冠霞帔命坐問
曰何以教子對曰幼則束以禮義長則訓以詩書太

宗歎曰孟母也賜白金千兩 易簡性嗜酒太宗嘗以詩戒之在翰林入直雖不敢飲在私第未嘗不醉及其死太宗曰易簡果以酒敗可惜也

蘇紳字儀甫泉州晉江人也舉進士又舉賢良方正入等遷祠部員外郎直史館為開封府官三司鹽鐵判官仁宗以天異地震方春而雷下詔求直言紳上疏又陳八事仁宗嘉納之 除史館修撰知制誥翰林學士知河陽徙河中府 子頌

蘇頌字子容紳之子也舉進士為南京留守推官杜衍
老居睢陽一見深器之為館職者九載餘神宗在藩
邸已聞其名即位擢知制誥至哲宗元祐中自翰林
承旨除尚書右丞越二年拜相又一年罷觀文殿大
學士集禧觀使其為相務在奉行故事使有司奉法
遵職執事最能授任杜絕僥倖之原深戒疆場之臣
邀功生事於書無所不讀子攜官徵猷閣待制汪
彥章尚銘其墓蘇權登第今為福州教官頌之後也

蘇洵字明允眉州眉山人也屢舉進士賢良不中至和嘉祐間與其二子軾轍至京師歐陽修得洵書二十篇大愛其文辭以為賈誼劉向不過也以其書獻諸朝名動京師而蘇氏文章遂擅天下一時學者皆尊其賢學其文以為師法以其父子俱知名號為老蘇修既上書得召試而洵不就除試校書郎有文集二十卷謚法三卷洵晚而好易曰易之道深矣洵而不明者諸儒以附會之說亂之也去之則聖人之旨

見矣作易傳書未及成而卒英宗聞而哀之特贈光祿寺丞張安道為墓表云王安石名始盛或勸先生與之游先生曰吾知其人矣是不近人情者鮮不為天下患作辨姦論云先生歿三年其言乃信

蘇軾字子瞻軾生十年而洵遊學四方母程氏親授以書比冠學通經史屬文日數千言歐陽修試禮部得軾論欲以冠多士疑曾鞏所為鞏修門下士也乃置第二遂中乙科修復以直言薦之制策入三等英

宗在藩聞軾名欲以唐故事召入翰林宰相韓琦曰
蘇軾之才遠大之器也天下之士莫不畏慕降伏皆
欲其進用然不若朝廷培養之而後用也 神宗召

見問何以助朕軾曰陛下求治太急聽言太廣進人
太銳願陛下安靜以應之神宗悚然嘉納出倅杭州
知密州徐州徙湖州以臺臣有言逮赴臺獄安置黃
州築室於東坡因自號東坡居士移汝州 哲宗即
位起知登州召為禮部郎除右史遷中書舍人尋遷

翰林學士兼侍讀軾嘗鑠宿禁中中使宣召入對便殿宣仁后問曰卿前年為何官曰臣前年為汝州團練使今為何官曰臣今待罪翰林學士曰何以遽至此軾曰遭遇太皇太后皇帝陛下宣仁曰非也軾曰宣大臣論薦乎宣仁曰亦非也軾驚曰臣雖無狀不敢自他途以進宣仁曰此乃先帝之意也先帝每誦卿文章必嘆曰奇才奇才但未及進用上僂耳軾不覺哭失聲宣仁與哲宗亦泣左右皆感涕也已而命

坐賜茶徹御前金蓮燭送歸院 請外以龍圖閣學
士知杭州軾治杭有德於民民為立祠召為翰林學
士承旨兼侍讀復請外乃以龍圖閣學士知潁州徙
揚俄以兵部尚書召還兼侍讀 宣后崩哲宗親政
乞補外以二學士知定州軾治定嚴軍政繕修營房
禁止飲博軍中衣食稍足乃部勒以戰法衆皆畏服
紹聖初御史論譏斥先朝惠州安置移昌化軍

徽宗即位提舉玉局觀尋致仕卒於常州 軾與弟

轍昏師洵為文幼而好書老而不倦為人篤於孝友
輕財好施獎善詆惡蓋其天性子邁迨過俱善為文
邁仕不顯迨靖康初為駕部郎過終定州倅
邁子符紹興間為禮部尚書符子山紹熙間為
司農少卿嶠乾道間為給事中峴淳熙間為太
府卿今判院杲皆先生之孫也

蘇轍字子由與兄軾同舉進士又同舉直言轍因所問
極言得失考官胡宿請黜之仁宗曰以直言召人而

以直言棄之天下謂我何除商州推官後以著佐從
張文定辟為南京學官子瞻下御史獄上疏乞納官
贖罪責監筠州酒元祐初召為校書郎除右司諫劾
呂惠卿之罪除起居郎中書舍人遷戶部侍郎拜翰
林學士權吏部尚書使契丹還為御史中丞自元祐
革新庶政至是五年矣一時人心已定惟元豐舊黨
猶在近臣患之欲引用以平宿怨謂之調停轍奏疏
曰親君子遠小人則主尊國安疏君子任小人則主

憂國殆此理之必然未聞以小人在外憂其不悅而引之於內以自遺患也惟陛下斷自聖心不為流言所惑毋使小人一進後有噬臍之悔則天下幸甚宣仁后覽奏謂宰執曰蘇轍疑吾君臣兼用邪正其言極中理除尚書右丞遷門下侍郎後連謫循雷二州元符末復太中大夫宮觀築室于許號潁濱遺老政和末薨年八十 子遲适遜 遲紹興間為工部侍郎 簡籀諤調林麓森皆諸孫也

蘇緘字宜又泉州晉江人也舉進士為南海簿廣州領
市舶司每海商至選官閱實貨貨其商酋皆州里右姓
至則凌轢官府以客禮見主者緘以選往有大商樊
氏入見遽升階就榻緘捕繫杖之樊氏訴于州州將
召緘責以專決罰緘曰主簿雖卑邑官也舶商雖富
部民也部民有罪而邑官杖之安得為專州將慰諭
遣之累遷祕書丞知英州儂智高反圍廣州緘蒐部
兵募壯勇合數千人赴難以功換供備庫副使

蘇舜欽字子美易簡之孫耆之子也舉進士稍遷大理
寺丞為人倜儻不羈尤長於古文歌詩行草士大夫
收之以為墨寶舜欽數上書言朝廷之事范仲淹薦
其才得集賢校理監進奏院用故紙祠神會賓客為
御史所糾坐除名舜欽既廢居蘇州買水石作滄浪
亭以自適後二年得湖州長史以卒初杜衍愛舜欽
之才以女妻之

蘇元老字在廷軾從孫也軾謫居海上數以書往來軾

喜其為學有功其季叔祖轍頗愛獎之黃庭堅見而
竒之曰此蘇氏之秀也舉進士歷官司農衛尉太常
少卿言者謂元老蘇軾從孫且曰元祐邪說不宜位
朝廷罷為提點明道宮元老歎曰昔顏子附驥尾而
名顯元老以家世學術坐累豈不榮哉

吳

百四十七

姓纂周太王子泰伯仲雍封吳後為越所滅子孫以
國為氏季札之後居齊魯間

吳季子名札吳子壽夢之少子出聘魯請觀周樂 見

子產如舊相識

史記吳起衛人好用兵司馬穰苴不能過 魏文侯以

為將與士卒分勞苦卒有病疽者起為吮之復為西

河太守 去為楚相南平百越北并陳蔡却三晉西

伐秦諸侯患之 說苑魏文侯浮西河曰美哉山河

之固此魏國之寶也吳起曰在德不在險

前漢吳芮秦時番陽令甚得江湖間心號曰番君

後漢吳漢字子彥南陽宛人為人質厚少文造次不能
以辭自達 隱若一敵國 及將朝廷斤斤謹質形
於體貌勇鷙有智謀諸將鮮能及者拜大司馬封廣
平侯

吳良字大儀躬儉安貧白首一節顯宗以為議郎

吳祐字季英陳留人嘗諫其父父撫其首曰吳氏世不

乏季子也

季札也

舉孝廉遷膠東侯相民有爭訟者

輒閉閤自責然後斷其訟以道譬之自是爭隙省息

吏人懷而不欺

吳志吳範字文則會稽人治歷數知風氣每有災祥推
數言狀其術多效領太史令為人剛直然與親故交
接有終始

晉書吳達吳興人見孝友傳

良吏吳隱之字處默博涉文史以儒雅標名弱冠而介
立有清操事母孝謹遷晉陵太守在郡清儉轉廣州
刺史至石門酌貪泉賦詩曰古人云此水一飲懷千

金試使夷齊飲終當不易心 清操不渝屢被褒飾

晉代良能此焉為最 子延之復屬清操為鄱陽
太守延之弟及子為郡縣者常以廉慎為門法

藝術吳猛少有孝行夏日不驅蚊懼其去已而噬親年
四十受神方以白羽畫水而渡江不假舟楫

南史吳喜涉獵史漢頗見古今宋明帝時四方反叛以
喜東征所至克捷東土平定後轉驍騎將軍大破魏
軍於荊亭

吳明徹字通照頗以英雄自許累功給大都督鉞鉞龍
麾授兗州刺史

文學吳邁遠好為篇章宋明帝見之曰此人連絕之外

無所復有

附檀
超傳

文學吳均字叔庠好學有俊才文體清拔有古氣好事
者或效之謂為吳均體

孝義吳達吳興人舉為孝廉

孝義吳慶之字文悅濮陽人也 又吳欣之晉陵利城

人

孝義吳達之嘗讓世舊田與族弟弟不受田遂閒廢詔
表門閭

隱逸吳苞字天益善三禮及老莊徵為太學博士不就
立館鍾山教授當時稱其儒者

北史孝行吳悉達遷葬曾祖已下九喪哀感毀悴有過
初喪有司奏聞標閭免役以彰孝義

藝術吳遵世字季緒少學易入恒山見一老翁授之開

心符以水吞之遂明占卜

唐吳兢汴州人少厲志貫知經史方直寡諧北魏元忠薦兢才堪論譔詔直史館修國史私撰唐書唐春秋敘事簡核號良史世謂今董狐云

吳筠通經義美文辭舉進士不中居南陽倚帝山玄宗遣使召見大同殿與語甚悅敕待詔翰林獻玄綱三篇復問神仙治鍊法對曰此野人事非人主留意每開陳皆名教世務以微言諷天子天子重之卒弟子

私謚為宗元先生

五代吳巒字寶川郾州盧縣人也清泰中大同沙彥珣
節度判官晉高祖起召契丹為援契丹過雲州彥珣
出城迎謁為契丹所擄城中推巒主州事巒即閉門
拒守契丹以兵圍之高祖入立以雲州入于契丹而
巒猶守城不下高祖義巒所為乃以書告契丹使解
兵去高祖召巒以為武寧軍節度副使諫議大夫

宋朝吳育字春卿建州建安人也為人明敏勁果強學

博辯舉進士甲科舉賢良方正策入三等有國以來
制舉惟育入三等前此未有也除著作郎直集賢院
通判蘇州加太常禮院為三司判官知諫院慶
歷五年拜右諫議大夫樞密副使數月除參知政事
山東盜起仁宗遣使察視還言盜不足慮也兗州
杜衍鄆州富弼山東人甚尊愛之臣切以為憂仁宗
欲徙二人育曰盜誠無足畏小人乘間以惑大臣此
可慮也議遂寢明年出知許州蔡州拜資政殿學士

徙知河南府又徙陝州永興軍以喪免服除知汝州
復知陝州加拜資政殿大學士尚書左丞知河中府
徙河南卒謚正肅弟充

吳充字沖卿舉進士嘗為國子監直講兼吳王宮教授
他官與宗室狎習無誨導之誼充獨以嚴見憚為宗
室六箴以獻仁宗命分寫遍賜皇族英宗書之坐右
熙寧初為龍圖閣直學士右諫議大夫工部侍郎
逾年拜相充為相務安靜然素多病力辭位除觀

文殿大學士吏部尚書西太一宮使卒謚正憲 充
神采秀徹詞氣溫厚內行修飭凡事甚謹

吳奎字長文維州北海人也舉進士尋知保州舉賢良
方正對策入等擢太常博士通判陳州加直集賢院
改起居舍人同知諫院 御史先事論赦書中語語
所從來奎奏言御史許風聞言事事有非實則當容
之若窮其主名自後誰敢以事告于陛下者是自蔽
其耳目也 奎奉使契丹遇虜主加稱號邀使者入

賀奎自以使事有職不為往比還中道與虜使遇虜人衣服以金冠為重紗冠次之而使人輒欲以紗冠邀漢使盛服奎不許而殺其禮見之坐是黜知壽州至神宗即位復拜樞密副使踰月參知政事出知青州卒謚文肅 奎性强記博識於書無不覽少時甚貧晚貴以錢二百緡置義庄以周親戚朋友之貧者死之日家無餘財諸子至無屋以居當世稱之

吳中復字仲庶興國軍人也舉進士通判潭州孫抃未

識中復即舉為監察御史裏行或問其故并曰昔人
恥呈身御史今豈薦識面臺官耶遷殿中侍御史裏
行擢天章閣待制知潭州徙瀛州改漕河東進龍圖
閣直學士知成都府移知成德軍時方行青苗法使
者至將徧行諸邑中復謂斂散固自有時止之移知
成都府遷給事中知永興軍知荆南卒 中復為人
樂易簡約好周人之急士大夫稱之

吳居厚字敦老豫章人也舉進士第元豐初為提舉河

北常平又漕京東即萊蕪利國兩監官自鼓鑄贍足
一路一日手詔謂今內外財計之臣政績著驗未有
過居厚者即拜天章閣待制又請鑄大錢以一當二
歲出二十萬緡以佐關陝兵食神宗曰居厚於本職
之外卹及他路非材智有餘不能爾居厚任職以辨
治聞數被褒詔出知和州創將理院致醫藥使病者
有歸多所全活後朝廷設坊安濟大槩如居厚所建
云再尹開封除戶部尚書拜右丞遷中書門下侍郎

復拜門下侍郎知樞密院事每從容言於徽宗曰北
朝盟好不可違也願益敦信誓以安其情徽宗嘉納
焉卒贈開府

吳淑字正儀潤州人也幼有俊才韓熙載潘佑皆以文
章著名江左一見淑深加器重曰吳正儀中林之蘭
蕙也因問以唐太宗杜淹論樂異同淑曰志氣未動
則聲能致和哀樂既行則樂乃思變熙載佑嘆曰足
以探禮樂之情矣淑在江南舉進士擢高第補丹陽

尉久之直內史從李煜歸朝以近臣薦積官職方員
外郎 子遵路

吳遵路舉進士累遷司封員外郎除漕淮南知洪州入
修起居注除天章閣待制知開封府出知宣州上陝
西御戎要畧二十篇徙陝西都運遷龍圖閣直學士
知永興軍卒 遵路厚重寡言篤於風義居母喪廬
墓側蔬食終制

吳拜字正仲滁之全椒人與兄竝弟茲同舉進士與茲

偕試宏詞並中魁等士林多傳誦之當時宰相稱嘆
曰北郊大禮慶成頌新建尚書省記雖使老師宿儒
窮年杼思未必能到也出入中外垂三十年靖康初
入翰林進承旨建炎間以龍圖閣學士奉祠

吳敏字元中儀真人釋褐累官中書舍人遷給事中宣
和間復召還舊物兼直禁林制詞溫厚人多傳誦河
北德音云桑麻千里皆祖宗涵養之休禮義百年亦
父老訓誨之力靖康初進元樞拜少傅建炎間起師

長沙

符 百四十八

姓纂魯頃公孫公雅為秦符璽令因為氏焉

後漢符融字偉明遊太學師事李膺膺每見融輒絕它
賓客聽其言論融幅巾奮袖談辭如雲膺每捧手嘆
息公府連辟皆不應

唐符令奇沂州人挈子璘奔昭義節度使薛嵩嵩卒田
承嗣盜其地引令奇為右職田悅拒命馬璘敗之令

奇語璘曰吾觀田氏覆亡無時汝能委質朝廷為唐忠臣吾亦名揚後世矣璘泣曰悅忍人也近禍可畏
荅曰今王師四合吾屬組中醢兒今行吾死不朽不行吾亦死尸疊逆地云何璘與父嚙臂別以衆降璘
悅怒引令奇切讓令奇罵曰爾忘義背主旦夕死吾
教子以順殺身庸何傷

五代符道昭蔡州人也梁太祖為元帥初開府而李周
彝以麟州降以為左司馬擇右司馬難其人及得道

昭乃授之

符存審字德詳陳州宛丘人也事李罕之罕之歸晉晉王以為義兒軍使賜姓李名存審存審為將有機畧大小百餘戰未嘗敗衄與周德威齊名

符習趙州昭慶人也以事趙王自晉救趙破梁軍柏鄉趙嘗遣習將兵從晉後拜習天平軍節度使二子令謙蒙令謙官至趙州刺史有善政卒于州州人號泣送葬數千人當時號為良刺史蒙少好學性

剛鯁為成德軍節度副使後事晉官至禮部侍郎

宋朝符彥卿字冠侯陳州宛丘人也父存審彥卿少事
唐晉漢周封魏王至宋興遷太師為御史所糾退居
于洛八年間乘小車駟遍遊佛寺名園人伏其曠達
性不飲酒謙恭待士對賓客清談終日不及世務為
將有謀善戰所得奉賜皆分給士卒故人樂為之用
周世宗二后宋太宗懿德皇后皆彥卿女也

蒲
百四十九

姓纂風俗通有詹事蒲昌又有蒲遵晉書苻洪傳云
其先家居池中生蒲皆長三丈因號蒲家遂以為氏
後改為苻也

宋朝蒲宗孟字傳正閬州新井人也舉進士為蘇州推
官除館閣校勘熙寧中為集賢校理同修起居注直
舍人院擢右正言知制誥為翰林學士神宗曰學
士職清地近而官儀未寵自今宜佩魚學士佩魚自
宗孟始也元豐五年除尚書左丞出知汝州亳州杭

州鄆州河中府移帥永興又移北都以疾求河中既至卒

苻 百五十

姓纂前秦主苻健本胡姓有扈之後為苻所滅奔西戎代為氏苻本姓蒲蒲洪以孫堅背上有草付文改為苻

晉載記苻洪字廣世其先蓋有扈之苗裔世為西戎苻長本氏蒲以識文有草付應王遂改姓苻氏自稱三

秦王

符雄字元才洪之季子健僭位為佐命元勲謙謹奉法
子堅字永固

符融字博休堅之季弟未弱冠便有台輔之望 嘗著
浮圖賦壯麗清瞻世咸珍之 膂力雄勇百夫之敵
尤善斷獄姦無所容州郡疑獄莫不折之 為將
善謀畧專方征伐必有殊功

符朗字元達堅從兄子幼懷遠操不屑時榮堅目之曰

吾家千里駒也 及為方伯有若素士 每談虛語
玄不覺日之將夕 風流邁於一時



名賢氏族言行類稿卷七